

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O IZMJENAMA I DOPUNAMA ZAKONA O LOVSTVU**

Sarajevo, novembar 2013. godine

Z A K O N

O IZMJENAMA I DOPUNAMA ZAKONA O LOVSTVU

Član 1.

U Zakonu o lovstvu („Službene novine Federacije BiH“, br. 4/06 i 8/10) u članu 1. stav 1. riječi: „organizacija lovstva i lovišta“ zamjenjuju se riječima: „ustanovljenje i dodjela lovišta“.

Član 2.

Član 2. mijenja se i glasi:

„Član 2.

U ovom zakonu u upotrebi su pojmovi sa slijedećim značenjem:

Divljač, u pogledu ovoga zakona su određene vrste životinja koje slobodno žive u prirodi;

Pravo lova je ovlaštenje da se na određenoj površini zemljišta i voda provedu radnje i preduzimaju mjere uzgoja, zaštite i racionalnog korištenja divljači;

Korisnik lovišta je pravno lice koje je na osnovu odredbi ovoga zakona dobilo lovište na gazdovanje;

Lovište je određena površina zemljišta koja predstavlja zaokruženu prirodnu cjelinu u kojoj postoje ekološki i drugi uslovi za uzgoj, zaštitu, lov i racionalno korištenje divljači;

Otvoreno lovište je lovište u kojem je moguća neometana dnevna i sezonska migracija divljači;

Ograđeno lovište je lovište u kojem je smanjena mogućnost (prirodno ili ograđeno preprekama) migracije divljači;

Uzgajalište divljači je ograđeni dio lovišta namijenjen intenzivnom uzgoju divljači za potrebe naseljavanja, povećanja brojnosti u lovištima, lov i proizvodnju mesa;

Lovno-privredna osnova je planski akt kojim se uređuje gazdovanje divljači i lovištem za desetogodišnji period;

Program uzgoja divljači je planski i privredni akt kojim se potanko uređuje uzgoj, zaštita, lov i upotreba divljači u uzgajalištima divljači;

Trofej divljači predstavlja divljač ili određeni dio divljači, obrađen na odgovarajući način, tako da se može ocjenjivati prema međunarodnim formulama za ocjenu trofeja;

Vrhunski trofej divljači je trofej ocijenjen većim brojem bodova od evidentiranog najjačeg trofeja pojedine vrste divljači u Federaciji;

Lov je skup osmišljenih aktivnosti čovjeka, u svrhu odstrjela ili hvatanja životinja, ovim zakonom označenih kao divljač.“

Član 3.

U članu 5. iza riječi „sakupljanje“ dodaju se riječi: „odstrijeljene i“.

Član 4.

U članu 6. stav 2. alineja 8. briše se.

Član 5.

U članu 7. stav 2. riječ „zaštićene“ briše se.

Član 6.

U članu 10. iza stava 3. dodaju se novi st. 4. i 5. koji glase:

“Korisnici lovišta u smislu ovoga zakona ne mogu biti pravna lica koja su kažnjavana za prekršaj iz člana 82. stav 1. tač. 1., 2., 3., 4., 5. i 16. i člana 83. stav 1. tač. 8., 11. i 12. ovoga zakona

Korisnik lovišta je dužan:

- da izvrši inventuru životinjskih vrsta i stanja lovišta najmanje jednom godišnje;
- da obezbijedi finansijska sredstva za provođenje lovno-privredne osnove, za sanaciju šteta na divljači i lovištu, kao i nadoknadu štete koju pričini divljač;
- da ima stručnu službu, odnosno stručno lice za sprovođenje lovno-privredne osnove;
- da ima organizovanu lovočuvarsku službu;
- da ima lovačke pse odgovarajuće pasmine za lovište koje koristi, koji posjeduje rodni list (rodovnik, pedigree) jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru) i imaju položen ispit urođenih osobina;
- da ima lovačkog psa osposobljenog za praćenje krvnog traga ili krvosljednika s položenim ispitom, ako u lovištu koje koristi ima predviđen odstrjel krupne divljači ili da ima ugovor o korištenju psa sa pravnim ili fizičkim licem koje posjeduje takvog psa.“

Član 7.

U članu 12. st. 3. i 4. brišu se.

Član 8.

Član 13. mijenja se i glasi:

„Član 13.

Divljač u smislu ovoga zakona su sljedeće vrste životinja:

a) DLAKAVA DIVLJAČ (SISARI)

- **Glodari** (*Rodentia*): bizamski pacov (*Ondatra zibethicus*), puh obični (*Glis glis*), vjeverica (*Sciurus vulgaris*), evropski dabar (*Castor fiber*);
- **Dvojezubci** (*Lagomorpha*): zec (*Lepus europeaus*), divlji kunić (*Oryctolagus cuniculus*);
- **Mesojedi** (*Carnivora*): divlja mačka (*Felis silvestris*), ris (*Lynx lynx*), vuk (*Canis lupus*), čagalj (*Anis aureus*), lisica (*Vulpes vulpes*), kuna zlatica (*Martes martes*), kuna bjelica (*Martes foina*), smeni tvor (*Putorius putorius*), velika lasica – hermelin (*Mustela erminea*), lasica mala (*Mustela nivalis*), vidra (*Lutra lutra*), jazavac (*Meles meles*), mrki medvjed (*Ursus arctos*).
- **Papkari** (*Arctiodactyla*): obični jelen (*Cervus elaphus*), jelen lopatar (*Dama dama*), srna (*Capreolus capreolus*), divokoza (*Rupicapra rupicapra*), muflon (*Ovis musimon*), divlja svinja (*Sus scrofa*)

b) PERNATA DIVLJAČ (PTICE)

- **Koke** (*Phasianidae*): fazan (*Phasianus colchicus*), prepelica počpura (*Conturnix coturnix*), jarebica poljska-trčka (*Perdix perdix*), jarebica kamenjarka – grivna (*Alectoris graeca*), jarebica šumska – lještarka (*Terastes bonasia*), veliki tetrijeb – gluhan (*Tetrao urogallus*), mali tetrijeb-ruševac (*Lyrurus tetrix*).
- **Patke** (*Anatidae*): patka gluhara (*Anas platyrhynchos*), patka pupčanica (*Anas querquedula*), patka glogoljica (*Netta rufina*), patka kreketaljka (*Anas strepera*), patka lastarka (*Anas acuta*), patka kašikara (*Anas clypeata*), patka krunata (*Aythya fuligula*), patka glavata (*Aythya ferina*), utva zlatokrila (*Tadorna ferruginea*), utva morska (*Tadorna tadorna*), guska divlja (*Anser anser*), guska glogovnjača (*Anser fabalis*), guska lisasta (*Anser albifrons*), labud crvenokljuni (*Cygnus olor*), labud žutokljuni (*Cygnus cygnus*), ronac veliki (*Mergus merganser*), ronac srednji (*Mergus serrator*), ronac mali (*Mergus albellus*).
- **Čaplje** (*Ardeidae*): čaplja siva (*Ardea cinerea*), čaplja danguba (*Ardea purpurea*), čaplja žuta (*Ardeola ralloides*), čaplja bijela (*Egretta garzetta*), gak kvakavac (*Nycticorax nycticorax*), bukavac – nebogled (*Botaurus stellaris*), čapljica mala (*Ixobrychus minutus*).
- **Rode** (*Ciconiidae*): bijela roda (*Ciconia ciconia*), crna roda (*Ciconia nigra*).
- **Ražnji** (*Threskiornithidae*): ražan blistavi (*Plegadis falcinellus*), žličarka bijela (*Platalea leucorodia*).
- **Pelikani** (*Pelecanidae*): nesit ružičasti (*Pelecanus onocrotalus*), nesit kudravi (*Pelecanus crispus*).
- **Jastrebovi** (*Accipitridae*): sup bjeloglavi (*Gyps fulvus*), sup smeđeglavi (*Aegypius monachus*), kostoberina žutoglava-bradan (*Gypaetus barbatus*), strvinar bijeli (*Neophron percnopterus*), orao suri (*Aquila chrysaetos*), orao krstaš (*Aquila heliaca*), orao štekavac (*Haliaeetus albicilla*), orao ribar (*Pandion haliaetus*), škanjac mišar (*Buteo buteo*), škanjac gaćaš (*Buteo lagopus*), jastreb kokošar (*Accipiter gentilis*), kobac ptičar (*Accipiter nisus*), eja močvarica (*Circus aeruginosus*), eja livadarica (*Circus pygargus*), eja stepska (*Circus macrourus*), lunja crna (*Milvus migrans*), lunja hrđasta (*Milvus milvus*).

- **Sokolovi** (*Falconidae*): soko sivi (*Falco peregrinus*), soko kragujac (*Falco subbuteo*), soko smeđi (*Falco cherrug*), soko južni (*Falco biarmicus*), soko kraguljić (*Falco columbarius*), vjetruša kličtava (*Falco tinnunculus*), vjetruša kopčić (*Falco vespertinus*), vjetruša bjelonokta (*Falco naumanni*).
- **Ždralovi** (*Gruidae*): sivi ždral (*Grus grus*).
- **Liske** (*Rallidae*): liska crna (*Fulica atra*), kokošica mlakara (*Rallus aquaticus*), zelenonoga mlakuša (*Gallinula chloropus*), hariš prдавac (*Crex crex*), štijoka kušica (*Porzana pusilla*), štijoka riđa (*Porzana porzana*).
- **Droplje** (*Otididae*): droplja velika (*Otis tarda*), droplja mala (*Tetrax tetrax*).
- **Vivci** (*Chardriidae*): vivak (*Vanellus vanellus*).
- **Šljuke** (*Scolopacidae*): šljuka šumska (*Scolopax rusticola*), barska šljuka-šljuka kokošica (*Gallinago gallinago*), šljuka livadarka (*Gallinago media*), šljuka kozica-mala bokasina (*Lymnocyptes minimus*), mrka prutka (*Tringa ochropus*), crvenonoga prutka (*Tringa totanus*), crvenorepa muljača (*Limosa limosa*), muljača smeđa (*Limosa lapponica*).
- **Pomornici** (*Stercorariidae*): kratkorepi pomornik (*Stercorarius parasiticus*), širokorepi pomornik (*Stercorarius pomarinus*).
- **Galebovi** (*Laridae*): galeb riječni (*Larus ridibundus*), galeb srebrni (*Larus argentatus*), galeb obični (*Larus canus*), galeb mali (*Larus minutus*), galeb crni mediteranski (*Larus melanocephalus*).
- **Čigre** (*Strenidae*): čigra obična (*Sterna hirundo*), čigra mala (*Sterna albifrons*), čigra crna (*Chlidonias niger*).
- **Golubovi** (*Columbidae*): golub divlji (*Columba livia*); golub grivnjaš (*Columba palumbus*), golub dupljaš (*Columba oenas*), grlica (*Streptopelia turtur*), gugutka-kumrija (*Streptopelia decaocto*).
- **Sove** (*Strigidae*): velika ušara-buljina (*Bubo bubo*), mala ušara-utina (*Asio otus*), ušara šumska (*Strix aluco*), čuk (*Athene noctua*), kukuvija (*Tyto alba*).
- **Vranci, kormorani** (*Phalacrocoracidae*): vranac veliki-kormoran (*Phalacrocorax carbo*), vranac kukmaš (*Phalacrocorax aristotelis*), vranac mali (*Phalacrocorax pygmeus*).
- **Gnjurci** (*Podicipedidae*): gnjurac ćubasti (*Podiceps cristatus*), gnjurac riđoglavi (*Podiceps grisegena*), gnjurac zlatouhi (*Podiceps nigricollis*), gnjurac ušati (*Podiceps auritus*), gnjurac mali (*Podiceps ruficollis*).
- **Pljenori** (*Gaviidae*): pljenor srednji (*Gavia arctica*), pljenor mali (*Gavia stellata*).
- **Vrane** (*Corvidae*): gavran (*Corvus corax*), vrana siva (*Corvus cornix*), gačac (*Corvus frugilegus*), čavka (*Corvus monedula*), kreha-sojka (*Garrulus glandarius*), svraka (*Pica pica*), kreja lješnikara (*Nucifraga caryocatactes*), galica planinska (*Pyrrhocorax graculus*).

Ako se na teritoriji Federacije pojavi ili unese nova životinjska vrsta, njen status divljači privremeno će odrediti federalni ministar poljoprivrede, vodoprivrede i šumarstva (u daljem tekstu: Federalni ministar), dok se to pitanje ne uredi zakonom.

Član 9.

U članu 15. stav 1. alineja 1. riječ „kozorog“ briše se, a iza riječi "ris" dodaje se interpunkcijski znak „zarez“ i riječi: "obični jelen, evropski dabar".

Član 10.

Član 17. mijenja se i glasi:

„Član 17.

Lovostajem zaštićena divljač je: mrki medvjed na uzgojnim područjima, srna, divokoza, obični jelen, jelen lopatar, muflon, zec, vuk, kuna zlatica, kuna bjelica, divlja svinja, evropski dabar, veliki tetrijeb-mužjak, fazan, prepelica, jarebica kamenjarka, jarebica poljska, jarebica šumska-mužjak, šljuke, divlji golubovi, grlica, divlje patke, divlje guske i crna liska.

Uzgojna područja mogu se ustanoviti za zaštićene vrste divljači, na zemljištima i vodama na kojima postoje ekološki i prirodni uslovi za njihov opstanak (razvoj i reprodukcija).

Uzgojna područja ustanovljava federalni ministar na prijedlog kantonalnog ministra nadležnog za poslove lovstva (u daljem tekstu: kantonalni ministar), odnosno kantonalnih ministara ako se uzgojno područje nalazi na području dva ili više kantona.“

Član 11.

U članu 25. broj „600“ zamjenjuje se brojem „400“:

Član 12.

Član 26. mijenja se i glasi:

„Član 26.

Unošenje u lovište nove vrste divljači i ponovno naseljavanje nestalih vrsta divljači provodi se u skladu sa planovima gazdovanja lovištem i Zakonom o zaštiti prirode („Službene novine federacije BiH“, broj 66/13). “

Član 13.

Član 27. mijenja se i glasi:

„Član 27.

Za potrebe naučnog istraživanja, obrazovanja, zooloških vrtova, muzeja, naseljavanje lovišta i suzbijanja zaraznih bolesti, federalni ministar može odobriti hvatanje i držanje divljači u zatvorenom, odnosno, ograđenom prostoru.

U slučaju iz st. 1. ovog člana donosi se rješenje kojim se propisuju način i mjere koje će se pri tome provoditi, te period važenja odobrenja.“

Član 14.

Član 31. mijenja se i glasi:

„Član 31.

Lovištem, u smislu ovog zakona, smatraju se površine zemljišta, šuma i voda koje predstavljaju prostornu, prirodnu i lovno-privrednu cjelinu u kojoj postoje uslovi za trajan opstanak, uzgoj, razmnožavanje, zaštitu i korištenje divljači, bez obzira na vlasništvo.

Lovište osniva skupština kantona na prijedlog vlade kantona.

Akt o osnivanju lovišta obavezno sadrži: naziv lovišta, granice i ukupnu površinu lovišta, vrste divljači koje ga naseljavaju, divljač koja je pod posebnom zaštitom i druge potrebne podatke.

Prema namjeni lovišta mogu biti: sportsko-privredna, privredna i lovišta sa posebnom namjenom (posebna lovišta).

Pod privrednim lovištem podrazumijeva se lovište čija je osnovna namjena bavljenje lovstvom u cilju sticanja dobiti.

Pod sportsko-privrednim lovištem podrazumijeva se lovište čija je namjena sportsko-privrednog karaktera.

Na površinama šuma sa posebnom namjenom (naučnog, kulturnog, vjerskog, historijskog i dr. značaja) kao i na površinama koje predstavljaju izuzetno pogodna staništa rijetkih, proriđenih i vrijednih vrsta divljači, Vlada Federacije Bosne i Hercegovine (u daljem tekstu: Vlada Federacije) na prijedlog federalnog ministra može osnovati posebno lovište uz prethodno pribavljenu saglasnost vlade kantona.

Ako se lovište nalazi na području dva ili više kantona, saglasnost za osnivanje posebnog lovišta daju vlade kantona.

Aktom o osnivanju lovišta iz st. 7. i 8. ovog člana Vlada Federacije određuje i korisnika lovišta.“

Član 15.

U članu 34. stav 1. iza riječi „otvorena lovišta“ briše se interpunkcijski znak „zarez“, a riječi: „i uzgajališta divljači“ brišu se.

U stavu 4. broj „600“ zamjenjuje se brojem „400“.

St. 5. i 6. istog člana brišu se.

Član 16.

Iza člana 34. dodaje se novi član 34a. koji glasi:

"Član 34a.

Uzgajalište divljači je ograđeni dio lovišta koji obuhvata površine zemljišta veće od 100 ha, a manje od 2000 ha na kojima se mogu uzgajati pojedine vrste divljači za proizvodnju većeg broja kvalitetne i zdrave divljači namijenjene za reprodukciju, potrebe naseljavanja i povećanja brojnosti u lovištima, lov i proizvodnju mesa.

Izuzetno od stava 1. ovoga člana, uzgajalište divljači može se ustanoviti na vlastitim površinama privrednog ribnjaka sa obalnim zemljištem ili rasadnicima i voćnim i

loznim nasadima namijenjenim za intenzivnu proizvodnju i na drugim površinama zemljišta u privatnom vlasništvu.

Dozvolu za ustanovljavanje uzgajališta divljači iz stava 2. ovog člana izdaje kantonalno ministarstvo na zahtjev vlasnika privatnog posjeda.

Uzgajalište divljači se ustanovljava u skladu sa važećom lovno-privrednom osnovom i godišnjim planom gazdovanja lovištem.“

Član 17.

Član 36. mijenja se i glasi:

“Član 36.

Privredno lovište dodjeljuje se na korištenje u skladu sa ovim zakonom, Zakonom o koncesijama („Službene novine Federacije BiH“, br. 40/02 i 61/06) - (u daljem tekstu: Zakon o koncesijama) i zakonom o koncesijama kantona.

Pravo učešća na javnom pozivu za dodjelu privrednog lovišta ima pravno lice registrovano za obavljanje djelatnosti lovstva.

Uz prijavu na javni konkurs za dodjelu privrednog lovišta učesnik je dužan dostaviti sljedeće :

- izvod iz sudskog registra;
- izjavu da će, u slučaju da bude izabran za korisnika lovišta, obezbjediti profesionalnu lovočuvarsku službu prije potpisivanja ugovora o dodjeli lovišta na korištenje;
- izjavu da će, u slučaju da bude izabran za korisnika lovišta, obezbjediti stručnu službu prije potpisivanja ugovora o dodjeli lovišta na korištenje;
- izjavu da će, u slučaju da bude izabran za korisnika lovišta, obezbjediti bankovnu garanciju u visini godišnje naknade prije potpisivanja ugovora o dodjeli lovišta na korištenje;
- program unapređenja lovišta za period za koji se lovište daje na korištenje;
- dokaz da se protiv podnosioca prijave na javni poziv ne vodi postupak i da nije kažnjavan za prekršaj iz člana 82. stav 1. tač. 1., 2., 3., 4., 5., 16. i člana 83. stav 1. tač. 8., 11. i 12. ovoga zakona;

Prijave za dodjelu privrednih lovišta na korištenje vrednuju se na osnovu:

- visine ponuđene godišnje naknade za korištenje lovišta i
- visine planiranog ulaganja u cilju unapređenja lovišta.

Nadležni kantonalni organ donosi odluku o dodjeli koncesije za korištenje lovišta najpovoljnijem ponuđaču koji je ispunio i zadovoljio sve kriterije utvrđene u javnom pozivu.

Godišnja koncesiona naknada za korištenje lovišta je najpovoljnija cijena koja se postigne na javnom pozivu i ne može biti manja od 20% planiranog godišnjeg prihoda od odstrjela divljači.

Koncesiona naknada iz stava 6. ovog člana plaća se u skladu sa kantonalnim zakonom o koncesijama.

Prikupljena sredstva iz stava 6. ovog člana koriste se za unapređenje lovstva, kao i druge obaveze propisane ovim zakonom.

Jednom pravnom licu može se dodijeliti više lovišta na korištenje.

Rok na koji se dodjeljuje koncesija za korištenje lovišta ne može biti kraći od 10 godina, a ni duži od 30 godina.

Korisnik lovišta, lovište ili njegove dijelove ne može davati pod zakup ili ustupiti drugom korisniku.”

Član 18.

Član 37. mijenja se i glasi:

“Član 37.

Sportsko-privredno lovište dodjeljuje se u zakup putem javnog poziva koji raspisuje kantonalno ministarstvo.

Pravo učešća na javnom pozivu za dodjelu sportsko-privrednog lovišta imaju pravna lica registrovana za obavljanje djelatnosti lovstva i lovačka udruženja.

Uz prijavu na javni konkurs za dodjelu sportsko-privrednog lovišta na korištenje učesnik je dužan dostaviti sljedeće:

- izvod iz sudskog registra ili dokaz o upisu u registar udruženja građana;
- izjavu da će, u slučaju da bude izabran za korisnika lovišta, obezbjediti profesionalnu lovočuvarsku službu prije potpisivanja ugovora o dodjeli lovišta na korištenje;
- izjavu da će, u slučaju da bude izabran za korisnika lovišta, obezbjediti stručnu službu prije potpisivanja ugovora o dodjeli lovišta na korištenje;
- izjavu da će, u slučaju da bude izabran za korisnika lovišta, obezbjediti bankovnu garanciju u visini godišnje naknade prije potpisivanja ugovora o dodjeli lovišta na korištenje;
- program unapređenja lovišta za period za koji se lovište daje na korištenje;
- dokaz da se protiv podnosioca prijave na javni poziv ne vodi postupak i da nije kažnjavan za prekršaj iz člana 82. stav 1. tač. 1., 2., 3., 4., 5., 16. i člana 83. stav 1. tač. 8., 11. i 12. ovoga zakona;

Prijave za dodjelu sportsko-privrednih lovišta na korištenje vrednuju se na osnovu:

- visine ponuđene godišnje zakupnine za korištenje lovišta i
- visine planiranog ulaganja u cilju unapređenja lovišta.

Pored kriterija iz stava 4. ovoga zakona kantonalno ministarstvo može propisati dodatne kriterije na osnovu kojih se vrši vrednovanje prijave za dodjelu lovišta na korištenje.

Prije raspisivanja javnog konkursa za dodjelu sportsko-privrednog lovišta kantonalno ministarstvo propisuje način vrednovanja ponuda za dodjelu lovišta na korištenje.“

Član 19.

Iza člana 37. dodaju se novi čl. 37a. i 37b. koji glase:

„Član 37a.

Vlada kantona, na prijedlog komisije za provođenje procedure dodjele sportsko-privrednih lovišta u zakup (u daljem tekstu: „komisija“) donosi odluku o dodjeli lovišta najpovoljnijem ponuđaču koji ispunjava kriterije utvrđene u javnom pozivu.

Komisiju iz stava 1. ovog člana imenuje kantonalni ministar i čini je pet članova od kojih su tri diplomirana inženjera šumarstva i jedan diplomirani pravnik.

Godišnja zakupnina za korištenje lovišta ne može biti manja od 5% godišnjeg planiranog prihoda od odstrjela divljači.

Zakupnina se uplaćuje u korist budžeta kantona u iznosu od 60%, u korist Budžeta Federacije Bosne i Hercegovine (u daljem tekstu: Budžet Federacije) u iznosu od 20% i u budžet općine na čijem području se ostvaruje prihod u iznosu od 20% najkasnije do 31. januara za tekuću lovnu godinu.

Prikupljena sredstva iz stava 4. ovog člana koriste se za unapređenje lovstva, kao i druge obaveze propisane ovim zakonom.

Lovište se daje u zakup na period od 10 lovnih godina.

Jednom pravnom licu u zakup se može dati više lovišta.

Korisnik lovišta, lovište ili njegove dijelove ne može davati u podzakup ili ustupiti drugom korisniku.”

„Član 37b.

Posebno lovište se daje na korištenje na period od 10 lovnih godina.

Jednom pravnom licu može se dati više posebnih lovišta na korištenje.

Korisnik posebnog lovišta, posebno lovište ili njegove dijelove ne može davati pod zakup ili ustupiti drugom korisniku.”

Član 20.

Član 39. mijenja se i glasi:

„Član 39.

O dodjeli lovišta na korištenje, a na osnovu odluke nadležnog kantonalnog organa iz člana 36. stav 5. i člana 37a. stav 1. ovoga zakona zaključuje se ugovor između kantonalnog ministarstva i korisnika lovišta.

O dodjeli posebnog lovišta na korištenje, a na osnovu odluke Vlade Federacije BiH iz člana 31. stav 7. ovog zakona zaključuje se ugovor između Federalnog ministarstva i korisnika lovišta

Ugovor iz st. 1. i 2. ovog člana mora sadržavati: naziv lovišta, podatke o registraciji korisnika lovišta, vrijeme na koje se daje lovište u zakup odnosno pod koncesiju, granice lovišta, procjenu brojnog stanja divljači, uslove kojih se korisnik lovišta mora pridržavati, mjere koje je korisnik lovišta dužan preduzeti u cilju

unaprjeđivanja lovišta, mjere zaštite divljači, uslove organiziranja i finansiranja lovočuvarske službe, odredbe o provođenju lovno-privredne osnove, visinu i način plaćanja koncesione naknade odnosno zakupa, kao i uslove za raskidanja ugovora.

Ugovor o korištenju lovišta koje se daje pod koncesiju, osim navedenog u stavu 3. ovog člana mora sadržavati sve elemente iz člana 29. Zakona o koncesijama.

Pored elemenata iz st. 3. i 4. ovoga člana ugovorne strane mogu ugovoriti i druge obligaciono pravne elemente.“

Član 21.

Član 44. mijenja se i glasi:

„Član 44.

Za svako lovište vodi se katastar lovišta.

Korisnik lovišta vodi katastar lovišta.

Korisnik lovišta je dužan po jedan primjerak izrađenog katastra lovišta dostaviti Federalnom ministarstvu i kantonalnom ministarstvu.

Korisnik iz stava 2. ovog člana dostavlja katastar lovišta sa svim evidentiranim promjenama najdalje do 15. marta tekuće godine za proteklu lovnu godinu.

Sadržaj i način vođenja katastra lovišta propisuje federalni ministar.“

Član 22.

U članu 45. st. 4. i 6. brišu se.

Dosadašnji stav 5. postaje stav 4.

Član 23.

Član 46. mijenja se i glasi:

„Član 46.

Federalno ministarstvo daje saglasnost na lovno-privrednu osnovu uz prethodno pribavljeno mišljenje kantonalnog ministarstva.

Izrada nove lovno-privredne osnove mora biti završena četiri mjeseca prije isteka važeće lovno-privredne osnove.

Greške i nedostaci lovno-privredne osnove utvrđene od strane stručne komisije moraju se otkloniti u roku koji odredi komisija.

Izradu lovno-privrednih osnova finansira korisnik lovišta, a izrada lovno-privrednih osnova za posebna lovišta finansira se iz Budžeta Federacije.

Komisiju iz stava 3. ovog člana imenuje federalni ministar.“

Član 24.

Član 48. mijenja se i glasi:

„Član 48.

Godišnji plan gazdovanja lovištem sastoji se od plana uređenja lovišta, plana uzgoja i zaštite divljači, plana korištenja divljači i finansijskog plana.

Godišnji plan gazdovanja lovištem izrađuje korisnik lovišta za period od 01. aprila tekuće do 31. marta naredne godine (lovna godina).

Uz godišnji plan gazdovanja dostavlja se i izvještaj o izvršenju plana za proteklu lovnu godinu.

Saglasnost na godišnji plan gazdovanja lovištem daje kantonalno ministarstvo, a na godišnje planove gazdovanja za posebna lovišta daje Federalno ministarstvo.

Realizaciji godišnjeg plana gazdovanja lovištem može se pristupiti nakon dobijene saglasnosti od nadležnog organa.“

Do donošenja lovno-privredne osnove korisnici lovišta gazduju lovištem na osnovu privremenog godišnjeg plana gazdovanja lovištem, a najduže jednu godinu.

Postupak donošenja privremenog godišnjeg plana gazdovanja lovištem je isti kao i za redovni godišnji plan gazdovanja.“

Član 25.

U članu 49. stav 2. mijenja se i glasi:

„Izrada i revizija lovno-privredne osnove može se povjeriti pravnom licu registrovanom za obavljanje djelatnosti iz oblasti lovstva i koje ima zaposleno stručno lice sa visokom stručnom spremom šumarske struke, diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja i ima najmanje pet godina radnog iskustva u struci nakon završene visoke školske spreme ili fizičkom licu sa obrtnicom za obavljanje te djelatnosti sa visokom stručnom spremom šumarske struke, diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja i ima najmanje pet godina radnog iskustva u struci nakon završene visoke školske spreme.“

Član 26.

U članu 50. stav 3. broj „31“ zamjenjuje se brojem „15“.

Član 27.

U članu 51. stav 1. mijenja se i glasi:

„Sredstva koja korisnik lovišta ostvari u gazdovanju lovištem koriste se za realizaciju lovno-privredne osnove (gazdovanje i unapređivanje lovstva) i sticanje dobiti.“

Član 28.

U članu 55. stav 1. mijenja se i glasi:
„Divljač mogu loviti lica starija od osamnaest godina sa položenim lovačkim ispitom.“

Član 29.

Član 56. mijenja se i glasi:

„Član 56.

Lov krupne divljači vrši se na osnovu dozvole za lov, a lov sitne divljači na osnovu lovne karte.

Strani i domaći lovci turisti love na osnovu dozvole za lov.

Dozvolu za lov i lovnu kartu izdaje korisnik lovišta.

Federalni ministar propisuje oblik i sadržaj dozvole za lov i lovne karte.“

Član 30.

U članu 57. stav 1. alineja 5. riječ „pet“ zamjenjuje se riječju „dva“.

Član 31.

U članu 58. iza stava 1. dodaje se novi stav 2. koji glasi:

“Vlasnici lovačkih pasa dužni su pse označiti, vakcinisati i upisati u registar pasa u skladu sa odredbama Zakona o veterinarstvu („Službene novine Federacije BiH“, broj 46/00) i prijaviti pse i nova legla jednoj od članica Međunarodne kinološke federacije u Bosni i Hercegovini“.

Dosadašnji stav 2. postaje stav 3. i u istom se riječi: „Kinološki savezi u Federaciji izdaju“ zamjenjuju riječima: „Kinološki savez iz stava 2. ovog člana izdaje“.

Dosadašnji stav 3. postaje stav 4.

Član 32.

U članu 67. stav 2. riječi: “Lovački savez“ zamjenjuju se riječima: "Federalno ministarstvo".

U stavu 3. istog člana iza riječi: „dužni su“ dodaju se riječi: "Federalnom ministarstvu i".

U stavu 6. istog člana riječi: “Lovački savez“ zamjenjuju se riječima: "Federalno ministarstvo".

Član 33.

Član 80. mijenja se i glasi:

„Član 80.

Inspekcijski nadzor u provođenju ovoga zakona i propisa donesenih na osnovu ovoga zakona vrše federalna šumarska inspekcija (u daljem tekstu: federalna inspekcija) i nadležna kantonalna inspekcija (u daljem tekstu: kantonalna inspekcija).

Inspekcijski nadzor se vrši u skladu sa odredbama ovoga zakona, Zakona o organizaciji organa uprave u Federaciji Bosne i Hercegovine („Službene novine Federacije BiH“, broj 35/05), Zakona o inspekcijama u Federaciji Bosne i Hercegovine („Službene novine Federacije BiH“, broj 69/05) - (u daljem tekstu: Zakon o inspekcijama) i zakona kojim se regulira inspekcijski nadzor kantona“.

Član 34.

Iza člana 80. dodaju se novi čl. 80a., 80b., 80c. i 80d. koji glase:

"Član 80a.

Federalna inspekcija može neposredno obaviti poslove iz nadležnosti kantonalne inspekcije, kada ocijeni da se na drugi način ne mogu provesti odredbe ovoga zakona ili drugi propisi doneseni na osnovu njega, a kantonalna inspekcija nije obavila inspekcijski nadzor u za to naloženom roku ili nije završila postupak u roku.

Kantonalna inspekcija može po ovlaštenju i nalogu federalne inspekcije, izvršiti inspekcijski nadzor iz nadležnosti federalne inspekcije.

Član 80b.

Za federalnog i kantonalnog inspektora koji vrše nadzor nad provođenjem ovoga zakona može se imenovati lice koje ima visoku stručnu spremu šumarske struke, diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja i ispunjava ostale uslove propisane posebnim zakonom.

Član 80c.

Pored ovlaštenja i dužnosti određenih Zakonom o inspekcijama, federalni inspektor je ovlašten i dužan da:

1. kontroliše primjenu lovno-privredne osnove;
2. kontroliše primjenu godišnjeg plana gazdovanja lovištem, poslovne knjige i ostalu dokumentaciju kada je to potrebno radi kontrole primjene propisa i mjera koje se odnose na divljač i lovišta;

3. kontroliše rad lovačkih saveza u poslovima koji su im propisani ovim zakonom;
 4. kontroliše provođenje odredbi ovoga zakona o sanitarnom odstrjelu, odstrjelu za naučnoistraživačke svrhe kao i sokolarenje;
 5. kontroliše izvršavanje ugovornih obaveza korisnika lovišta;
 6. obavlja sve poslove i zadatke iz nadležnosti kantonalnog inspektora utvrđene ovim zakonom i propisima donesenim na osnovu njega.
- Ukoliko utvrdi da je povrijeđen ovaj Zakon ili drugi propis donesen na osnovu njega, federalni inspektor ima pravo i obavezu:
- rješenjem narediti otklanjanje utvrđenih nedostataka, odnosno nepravilnosti u određenom roku;
 - podnijeti nadležnom organu zahtjev za pokretanje prekršajnog postupka, odnosno krivičnu prijavu i
 - preduzeti i druge mjere, odnosno izvršiti druge radnje za koje je posebnim propisima ovlašten.

Član 80d.

Pored ovlaštenja i dužnosti određenih posebnim zakonom, kantonalni inspektor je ovlašten i dužan da:

1. kontroliše da li korisnik lovišta ispunjava propisane uslove za gazdovanje;
2. kontroliše da li je godišnji plan gazdovanja lovištem u skladu sa lovno-privrednom osnovom;
3. kontroliše lovljenje divljači, odobrenje za odstrjel divljači, lovne karte i trofejne listove za ulovljenu divljač;
4. kontroliše izvršavanje ugovornih obaveza korisnika lovišta;
5. pregleda radove i objekte u lovištima;
6. privremeno, do odluke nadležnog organa, oduzima bespravno ulovljenu ili bespravno prisvojenu divljač ili njene dijelove, kao i predmete kojima su izvršene ove bespravne radnje;
7. naredi privremene mjere za sprječavanje štete u hitnim slučajevima u kojima bi mogla nastupiti šteta;
8. prikuplja, kad je to potrebno, obavještenja od svjedoka, nalaz vještaka, odgovornih i drugih lica;
9. vodi službene podatke za područje kantona o povredama odredaba ovoga zakona i propisa donesenih na osnovu njega;
10. izvještava nadležnu inspekciju i druge organe o nepravilnostima i predlaže sprovođenje određenih mjera, ako sam nije ovlašten za preduzimanje odgovarajućih mjera;
11. podnosi prijavu za pokretanje prekršajnog postupka radi povrede odredaba ovoga zakona i propisa donesenih na osnovu njega;
12. preduzima i druge mjere i radnje za koje je ovlašten posebnim propisima.“

Član 35.

Član 81. mijenja se i glasi:

„Član 81.

Kada nadležni inspektor prilikom vršenja inspekcijskog nadzora utvrdi da propis nije primijenjen ili je nepravilno primijenjen donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.

Protiv rješenja kantonalnog inspektora može se izjaviti žalba Federalnoj upravi za inspekcijske poslove u roku od osam dana od dana prijema rješenja.

Protiv rješenja kantonalnog ministarstva može se izjaviti žalba Federalnom ministarstvu poljoprivrede, vodoprivrede i šumarstva u roku od 15 dana od dana prijema rješenja.

Protiv rješenja federalnog inspektora može se izjaviti žalba Federalnom ministarstvu poljoprivrede, vodoprivrede i šumarstva u roku od osam dana od dana prijema rješenja.

Član 36.

U članu 82. stav 1. tačka 1. mijenja se i glasi: „lovi divljač na zemljištima i vodama izvan lovišta (član 7. stav 2.)“.

U tački 9. riječi u zagradi: „član 38. stav 4.“ zamjenjuju se riječima: „član 36. stav 11., član 37a. stav 8. i član 37b. stav 3“.

U tački 17. broj „80.“ zamjenjuje se brojevima „80c. i 80d.“

Član 37.

U članu 83. stav 1. iza tačke 1. dodaje se nova tačka 2. koja glasi:

„ne izvrši inventuru životinjskih vrsta i stanja lovišta (član 10. stav 2. alineja 1.)“.

U tački 3. riječi: „bez odobrenja Federalnog ministarstva (član 26.)“ zamjenjuju se riječima: „suprotno odredbama člana 26“.

Tačka 12. mijenja se i glasi: „dozvoli lov licima koja nemaju položen lovački ispit (član 55.).

Tačka 15. briše se.

Dosadašnje tač. 2.,3.,4.,5.,6.,7.,8.,9.,10.,11.,12.,13.,14.,16. i 17. postaju tač. 3., 4., 5., 6., 7., 8., 9.,10., 11., 12.,13.,14.,15.,16. i 17.

Član 38.

U članu 84. tačka 3. briše se.

Tačka 10. mijenja se i glasi: „10. u lovu se koristi nečistokrvnim lovačkim psima i ne prijavi lovačkog psa ili novo leglo (član 58. st. 1. i 3.)“.

Dosadašnje tač. 4.,5.,6.,7.,8.,9.,10.,11.,12.,13.,14. i 15. postaju tač. 3., 4., 5., 6., 7., 8., 9.,10., 11., 12.,13. i 14.

Član 39.

Član 88. mijenja se i glasi:

„Član 88.

Nadležni kantonalni organi dužni su u roku od dvanaest mjeseci od dana stupanja na snagu ovoga zakona osnovati i dodijeliti lovišta na korištenje u skladu sa ovim zakonom.

Korisnici lovišta dužni su u roku od šest mjeseci od dana dobijanja lovišta na korištenje uskladiti svoje poslovanje, opće i druge akte sa odredbama ovoga zakona.

Do okončanja postupka ustanovljenja i dodjele lovišta na korištenje u skladu sa ovim zakonom, brigu o uzgoju i zaštiti divljači vodit će kantonalno ministarstvo.“

Član 40.

Usklađivanje podzakonskih propisa donesenih po osnovu Zakona o lovstvu („Službene novine Federacije BiH“, br. 4/06 i 8/10) sa odredbama ovoga zakona izvršit će se u roku od godinu dana od dana stupanja na snagu ovoga zakona.

Član 41.

Ovaj zakon stupa na snagu osmog dana od dana objave u „Službenim novinama Federacije BiH“.

OBRAZLOŽENJE ZAKONA O IZMJENAMA I DOPUNAMA ZAKONA O LOVSTVU

I - USTAVNI OSNOV

Ustavni osnov za donošenje ovog zakona sadržan je:

- u članu III. 1. b) Ustava Federacije Bosne i Hercegovine, koji je izmijenjen amandmanima VIII, LXXXIX i CVI, prema kojem je u isključivoj nadležnosti Federacije utvrđivanje ekonomske politike, uključujući planiranje i obnovu, te politika korištenja zemljišta na federalnom nivou;
- u članu III. 2. tačka c) i h) Ustava Federacije Bosne i Hercegovine, prema kojem su Federalna vlast i kantoni nadležni za politiku zaštite čovjekove okoline i korištenje prirodnih bogatstava;
- u članu IV. A. 20. (1) d) Ustava Federacije Bosne i Hercegovine, prema kojem Parlament Federacije, pored ostalih nadležnosti utvrđenih u Ustavu Federacije Bosne i Hercegovine, ima nadležnost i za donošenje zakona o vršenju funkcija federalne vlasti.

II – RAZLOZI ZA DONOŠENJE

Predstavnički dom Parlamenta Federacije Bosne i Hercegovine na tematskoj sjednici, održanoj dana 24.04.2012. godine na temu „Informacija o stanju u oblasti poljoprivrede, novčanih podrški, prehrambene industrije, veterinarstva, šumarstva i vodoprivrede“, usvojio je Zaključak broj:01-02-507/12 od 26.04.2012. godine, kojim se od Federalnog ministarstva poljoprivrede, vodoprivrede i šumarstva traži pokretanje aktivnosti na izmjenama Zakona o lovstvu kako bi se lovačkim društvima otvorila mogućnost da postanu korisnici lovišta.

Federalno ministarstvo poljoprivrede, vodoprivrede i šumarstva izradilo je tekst Prednacrtu Zakona o izmjenama i dopunama Zakona o lovstvu i isti uputilo u proceduru sa prijedlogom za njegovo donošenje po skraćenom postupku.

Vlada Federacije BiH na 76. sjednici održanoj 19.03.2013.godine je utvrdila Prijedlog Zakona o izmjenama i dopunama Zakona o lovstvu i uputila ga u parlamentarnu proceduru.

Predstavnički dom Parlamenta Federacije BiH na 20. sjednici održanoj 02.07.2013. godine i Dom naroda Parlamenta Federacije BiH na 16. sjednici održanoj 25.07.2013. godine usvojili su zaključak da se ponuđeni tekst Prijedloga Zakona o izmjenama i dopunama Zakona o lovstvu vrati u redovnu proceduru, odnosno da se razmatra kao Nacrt zakona, te da može poslužiti kao temelj za izradu Prijedloga Zakona o izmjenama i dopunama Zakona o lovstvu.

Zakon o lovstvu je objavljen 01.02.2006. godine („Službene novine Federacije BiH“, broj: 4/06) i stupio je na snagu 09.02.2006. godine. Njegova implementacija i nakon sedam godina još uvijek nije ili je samo djelimično izvršena.

Jedan od osnovnih razloga za donošenje Zakona o izmjenama i dopunama Zakona o lovstvu je potreba da se otklone određeni problemi i nedostaci koji su uočeni u dosadašnjoj primjeni Zakona o lovstvu Federacije BiH, odnosno da se poboljšaju njegova rješenja i istovremeno stvore uslovi za dugoročno i sistematsko planiranje, upravljanje, kontrolu i gospodarenje lovištima.

Postojećim Zakonom je propisano da kantonalna skupština u ostavljenom roku na prijedlog resornog kantonalnog ministarstva osniva lovišta, a Vlada kantona u skladu sa Zakonom o lovstvu i Zakonom o koncesijama ("Službene novine Federacije BiH", broj 40/02), provedi propisanu proceduru i na prijedlog kantonalne komisije za koncesije, izvrši izbor i dodjelu lovišta. Korisnici lovišta bili su dužni u roku od godinu dana od dana stupanja na snagu ovog Zakona uskladiti svoje poslovanje, opće i druge akte sa odredbama ovog Zakona.

Sagledavši sveukupnu problematiku u lovnom gospodarstvu i dostignuti nizak stepen implementacije Zakona o lovstvu na prostoru Federacije Bosne i Hercegovine, ovo Ministarstvo je konstatovalo da nadležni kantonalni organi u predviđenom prelaznom zakonskom periodu nisu, ili su tek djelimično izvršili svoje zakonske obaveze na implementaciji Zakona o lovstvu.

Što se tiče ustanovljavanja lovišta na prostoru Federacije Bosne i Hercegovine, shodno članu 31. Zakona o lovstvu, ustanovljena su lovišta na području osam (8) kantona, dok u dva (2) kantona još nije provedena zakonska procedura i nisu ustanovljena lovišta (Srednjobosanski i Hercegovačko-neretvanski kanton).

Dodjela lovišta na korištenje u skladu sa odredbama postojećeg Zakona o lovstvu nije izvršena ni u jednom kantonu. U Kantonu 10, provedena je zakonska procedura dodjele lovišta na gazdovanje samo za jedno lovište („Šator“), tako da je to jedino lovište u Federaciji BiH dodijeljeno na gazdovanje po važećim zakonskim propisima, na osnovu koncesionog ugovora. U većini kantona lovišta se dodjeljuju putem Ugovora o ustupanju lovišta na privremeno korištenje u trajanju od jedne godine, bez prethodno provedenog postupka, što je u suprotnosti sa odredbama Zakona o lovstvu.

Problem, koji se od strane kantonalnih ministara najčešće ističe kao razlog spore implementacije Zakona o lovstvu, je nejasnoća i nedostatak regulative oko procedure dodjele koncesija i određivanje koncesione naknade za korištenje lovišta.

Kao jedan od nedostataka postojećeg zakona ističe se i da lovačka udruženja registrovana u skladu sa Zakonom o udruženjima i fondacijama, a čija osnovna svrha nije sticanje dobiti, ne mogu dobiti koncesiju na lovišta.

Također, bitan razlog za donošenje ovog Zakona je nezadovoljavajuće stanje populacije divljači, kao dobra od općeg interesa u Federaciji BiH. Imajući u vidu prethodno navedeno, kao i veoma izraženo odsustvo mjera održavanja i poboljšanja stanja populacije divljači i njenih staništa, te skromne mogućnosti Budžeta Federacije BiH da ozbiljnije pomaže uvećavanju fonda divljači, rješenjima u ovom zakonu se insistira na utvrđivanju obaveza i stvaranju finansijske, organizacione i kadrovske podrške mjerama zaštite i održavanja postojećeg fonda divljači.

III – OPIS KONSULTACIJA

U postupku izrade Prednacrtu Zakona o izmjenama i dopunama Zakona o lovstvu, ovo Ministarstvo je radne verzije Zakona o izmjenama i dopunama Zakona o lovstvu, uz

svoje dopise broj: 07-26-2042/12 od 12.10.2012. godine i 07-26-2042-1/12 od 12.10.2012. godine, dostavljalo na davanje mišljenja, primjedbi i sugestija svim zainteresovanim stranama (kantonalna ministarstva nadležna za poslove šumarstva i lovstva, kantonalna šumskoprivredna društva, Federalna uprava za inspekcijske poslove, Savez općina i gradova Federacije BiH, Šumarski fakultet Sarajevo, Savez lovačkih organizacija u BiH, Lovački Savez Herceg Bosne, Savez lovačkih društava Tuzlanskog kantona). Radne verzije Prednacrt Zakona o izmjenama i dopunama Zakona o lovstvu, u cilju upoznavanja šire javnosti sa predloženim rješenjima, bile su postavljene i na web stranici ovog Ministarstva.

Nakon isteka roka za dostavljanje primjedbi na drugu radnu verziju Zakona o lovstvu (u koju su ugrađene utemeljene primjedbe dostavljene na prvu ponuđenu radnu verziju), ovo Ministarstvo je, u cilju dodatnih konsultacija i usaglašavanja odredbi Zakona o izmjenama i dopunama Zakona o lovstvu, organizovalo i održalo javnu raspravu dana 17.12.2012. godine.

Raspravi su prisustvovali ovlaštene predstavnici zainteresovanih strana: kantonalnih ministarstava nadležnih za poslove šumarstva i lovstva, Federalne uprave za inspekcijske poslove, Šumarskog fakulteta Sarajevo, Saveza lovačkih organizacija u BiH, Lovačkog saveza Herceg Bosne, Saveza lovačkih društava Tuzlanskog kantona.

Primjedbe i sugestije učesnika javne rasprave na tekst Prednacrt Zakona o izmjenama i dopunama Zakona o lovstvu su bile neznatne (zapisnik sa stručne rasprave u prilogu obrazloženja) i iste su prihvaćene i ugrađene u Prednacrt Zakona.

U postupku izrade Nacrta Zakona o izmjenama i dopunama Zakona o lovstvu, ovo Ministarstvo je nakon što su ugrađene primjedbe i sugestije iznesene na sjednicama Predstavničkog doma i Doma naroda uz dopis broj: 07-26-2176/13 od 05.08.2013. godine tekst Nacrta Zakona dostavilo na davanje mišljenja, primjedbi i sugestija svim zainteresiranim stranama (kantonalna ministarstva nadležna za poslove šumarstva i lovstva, kantonalna šumskoprivredna društva, Federalna uprava za inspekcijske poslove, Savez općina i gradova Federacije BiH, Šumarski fakultet Univerziteta u Sarajevu, Savez lovačkih organizacija u BiH, Lovački Savez Herceg Bosne, Savez lovačkih društava Tuzlanskog kantona, Ornitološko društvo „Naše ptice“).

Tekst Nacrta Zakona o izmjenama i dopunama Zakona o lovstvu, u cilju upoznavanja šire javnosti sa predloženim rješenjima, postavljen je na web stranici ovog Ministarstva.

Nakon što su ugrađene primjedbe i sugestije dostavljene od strane kantonalnih ministarstava nadležnih za poslove šumarstva i lovstva, Šumarskog fakulteta Univerziteta u Sarajevu, Saveza lovačkih organizacija u BiH, Lovačkog saveza Herceg Bosne, Saveza lovačkih društava Tuzlanskog kantona i Ornitološkog društva „Naše ptice“ ovo ministarstvo je održalo još dvije javne rasprave dana 11.09.2013. i 11.10.2013. godine.

Raspravama su prisustvovali ovlaštene predstavnici zainteresiranih strana: kantonalnih ministarstava nadležnih za poslove šumarstva i lovstva, Federalne uprave za inspekcijske poslove, , Šumarskog fakulteta Univerziteta u Sarajevu, Saveza lovačkih organizacija u BiH, Lovačkog saveza Herceg Bosne, Saveza lovačkih društava Tuzlanskog kantona, Ornitološkog društva „Naše ptice“.

Učesnici javne rasprave su pozitivno ocijenili tekst Nacrta Zakona o izmjenama i dopunama Zakona o lovstvu (zapisnici sa rasprava u prilogu obrazloženja), a utemeljene primjedbe i predložena rješenja učesnika javne rasprave detaljno su usaglašena i ugrađena u Nacrt Zakona.

IV – POSTUPAK PRIPREME OVOG ZAKONA

Radni materijal Prednacrt a i Nacrt a ovog Zakona je dostavljan svim kantonalnim ministarstvima nadležnim za lovstvo kao i ostalim stručnim, naučnim i zainteresiranim institucijama iz oblasti lovstva.

Sve pristigle primjedbe, prijedloge i sugestije ovo Ministarstvo je razmotrilo i sve utemeljene primjedbe dostavljene na ponuđene radne verzije su prihvaćene i ugrađene u tekst ovog Zakona.

V – PRIMJEDBE NADLEŽNIH KANTONALNIH MINISTARSTAVA

Ministarstvo Privrede – Kanton Sarajevo
Akt broj: 07-06-26-21502/13 od 23.08.2013. godine.

Ministarstvo Privrede-Sektor poljoprivrede, vodoprivrede i šumarstva –
Zapadnohercegovački kanton
Akt broj: 05-06-02-907/13 od 26.08.2013. godine.

Ministarstvo poljoprivrede, šumarstva i vodoprivrede – Hercegovačko-neretvanski
kanton
Akt broj: 11-06-28-2190-1/13 od 22.08.2013. godine.

Ministarstvo poljoprivrede, vodoprivrede i šumarstva – Unsko-sanski kanton
Akt broj: 08-26-8081-2/13 od 26.08.2013. godine.
Akt broj: 08-06-9160-2/13 od 20.09.2013. godine.

Ministarstvo poljoprivrede, šumarstva i vodoprivrede – Zeničko-dobojski kanton
Akt broj: 05-26-28-2176-3/13 od 23.09.2013. godine.

Prihvaćene primjedbe nadležnih kantonalnih ministarstava:

- Da u lovište ne ulaze javni putevi i druge javne površine uključujući i zaštitni pojas do 300 m od naselja;
- Da se vlasnicima privatnog zemljišta koje ulazi u sastav lovišta ne plaća naknada;
- Da korisnik lovišta treba imati profesionalnu stručnu službu;
- Da korisnici posebnih lovišta ne plaćaju naknadu;
- Da Federalno ministarstvo daje saglasnost na lovno-privrednu osnovu uz prethodno pribavljeno mišljenje kantonalnog ministarstva.

Primjedbe koje nisu prihvaćene:

Nije prihvaćen prijedlog da se izvrši izmjena člana 39. stav 3. ovog Zakona u smislu da do okončanja postupka ustanovljenja i dodjele lovišta na korištenje u skladu sa ovim Zakonom, brigu o uzgoju i zaštiti divljači vode dosadašnji korisnici lovišta, odnosno lovačka udruženja.

Prijedlog nije prihvaćen iz razloga što je divljač dobro od općeg interesa, uživa posebnu brigu i zaštitu Federacije i kantona i koristi se pod uslovima i na način koji je propisan Zakonom o lovstvu, te samim tim lovačka udruženja koja ni sada ne gospodare lovištima u skladu sa odredbama Zakona o lovstvu, ne mogu voditi brigu o divljači.

Nije prihvaćena predložena izmjena da se članom 32. propiše, da banku podataka o vrijednim trofejima vodi Lovački savez.

Prijedlog nije prihvaćen iz razloga što se vrhunski trofej ne može iznijeti izvan teritorije Federacije sve dok po vrijednosti (CIC poena) ne dođe na 4. mjesto.

Vrhunskim trofejima smatraju se tri po broju CIC poena najjača trofeja određene vrste divljači u Federaciji na osnovu banke podataka o vrijednim trofejima.

Obzirom da u Federaciji BiH imamo tri Lovačka saveza, ako bi oni vodili banku podataka o vrijednim trofejima imali bi smo situaciju da nam sa teritorije Federacije ne izlazi devet vrhunskih trofeja određene vrste divljači, što bilo u suprotnosti sa drugim odredbama Zakona o lovstvu.

Nije prihvaćen prijedlog da se izvrši izmjena člana 25. u smislu izrada i revizija lovno-privredne osnove može se povjeriti pravnom licu registrovanom za obavljanje djelatnosti iz oblasti lovstva i koje ima zaposleno stručno lice sa visokom stručnom spremom šumarske struke, diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja sa certifikatom za obavljanje poslova izrade i revizije lovno-privrednih osnova ili fizičkom licu sa obrtnicom za obavljanje te djelatnosti i certifikatom za obavljanje poslova izrade i revizije lovno-privrednih osnova.

Prijedlog nije prihvaćen iz razloga što na teritoriji Federacije BiH ne postoji institucija za certificiranje takvih kadrova.

VI – OBRAZLOŽENJE PREDLOŽENIH RJEŠENJA

U članovima 1. - 5. dato je preciznije značenje pojedinih pojmova (izraza) radi lakšeg razumijevanja ovog Zakona.

Članom 6. propisuju se dužnosti korisnika lovišta i utvrđuje ko ne može biti korisnik lovišta u Federaciji BiH.

U čl. 8. i 9. izvršene su manje korekcije u popisu prisustva određenih vrsta divljih životinja koje slobodno žive na prostoru Federacije BiH. Kozorog je izbrisan sa popisa divljači jer već duži vremenski period ova vrsta ne obitava na ovim prostorima, a dodane su vrste koje su prisutne (obični jelen i evropski dabar), a nisu bile na popisu.

Članom 10. propisan je način ustanovljavanja uzgojnog područja za pojedine vrste divljači, kao i izvršen popis lovostajem zaštićene divljači.

Članom 11. propisuje se minimalna površina ograđenog lovišta.

Članom 12. propisuju se uslovi za unošenje novih vrsta divljači i ponovno naseljavanje nestalih vrsta divljači.

Članom 13. propisuju se slučajevi u kojima se može odstupiti od zabrana iz člana 21. Zakona o lovstvu.

Članovima 14.-20. propisuje se način osnivanja lovišta, njihova namjena i dodjela lovišta na korištenje. Ovim članovima je u skladu sa Zaključkom Predstavničkog doma Parlamenta Federacije Bosne i Hercegovine omogućeno da lovačka udruženja mogu biti korisnici sportsko-privrednih lovišta. Istim članovima su također, jasno i precizno

propisani uslovi dodjele lovišta, postupak dodjele lovišta na korištenje, naknada za korištenje lovišta, kao i zaključivanje ugovora između nadležnog ministarstva i korisnika lovišta.

U članu 21. propisano je da korisnik lovišta vodi katastar lovišta i dužan je po jedan primjerak izrađenog katastra lovišta dostaviti Federalnom ministarstvu i kantonalnom ministarstvu.

Članom 23. propisano je ko daje saglasnost na lovno-privrednu osnovu.

Članovima 24.-28. propisuju se obaveze korisnika lovišta za donošenje lovno-privrednih osnova, donošenje godišnjeg plana gazdovanja lovištem usklađenog sa lovno-privrednom osnovom, kao i donošenje privremenog plana gazdovanja lovištem do donošenja lovno-privredne osnove. Ovim članovima je propisan sadržaj planova gospodarenja lovištem, način i vrijeme njihovog donošenja, vrijeme dostavljanja nadležnom Ministarstvu na potrebnu saglasnost, kao i korištenje sredstava koja korisnik lovišta ostvari u gospodarenju lovištem.

Članom 29. propisano je da se lov krupne divljači vrši na osnovu dozvole za lov, a lov sitne divljači na osnovu lovne karte.

Članom 30. propisano je da je zabranjeno uznemiravati i loviti divljač, između ostalog i lovačkim oružjem sa više od dva metka.

U članu 31. propisuje se da vlasnici lovačkih pasa imaju obavezu prijaviti lovačke pse i nova legla jednoj od članica „Međunarodne kinološke federacije“.

Članom 32. propisano je da umjesto Lovačkog saveza banku podataka o vrijednim trofejima vodi Federalno ministarstvo.

Čl. 33., 34. i 35. propisuju inspekcijski nadzor u provođenju ovog Zakona i propisa donesenih na osnovu ovog Zakona. Ovim članovima je propisano pod kojim uslovima se mogu imenovati federalni šumarski inspektor i kantonalni šumarski inspektor, kao i njihova ovlaštenja i dužnosti.

Čl. 36., 37. i 38. propisane su kaznene odredbe.

U članu 39. propisani su rokovi u kojim su nadležni kantonalni organi dužni osnovati i dodijeliti lovišta na korištenje u skladu sa ovim Zakonom.

Ovim odredbama lovačkim društvima se daje mogućnost da pod istim uslovima kao i drugi zainteresirani subjekti, ravnopravno učestvuju na javnom pozivu za dodjelu sportsko-privrednih lovišta, što dosadašnjim odredbama Zakona nije bilo precizirano.

Usvajanje ovih prijedloga doprinijelo bi bržoj implementaciji Zakona, a samim tim i stvaranju uslova za donošenje dugoročnih planova gospodarenja lovištima (lovno-privredne osnove), provođenje planiranih aktivnosti na uzgoju i zaštiti divljači, upravljanje, kontrolu i gospodarenje lovištima.

VII – FINANSIJSKA SREDSTVA

Za realizaciju odredaba ovog Zakona nije potrebno izdvojiti dodatna sredstva iz Budžeta Federacije Bosne i Hercegovine.

Z A K O N

O IZMJENAMA I DOPUNAMA ZAKONA O LOVSTVU

(Odredbe Zakona o lovstvu koje se mijenjaju
„Službene novine Federacije BiH“, br. 4/06 i 8/10)

Član 1.

Ovim zakonom uređuje se organizacija lovstva i lovišta, uzgoj, zaštita, lov i korištenje divljači i njezinih dijelova, katastar lovišta, lovno-privredna osnova i planiranje, lovočuvarska služba, upravni i inspekcijski nadzor nad provođenjem ovog zakona, kaznene odredbe i druga pitanja od značenja za oblast lovstva na teritoriji Federacije Bosne i Hercegovine (u daljem tekstu: Federacija).

Lovstvo u pogledu ovog zakona predstavlja javnu djelatnost i obuhvata mjere zaštite i uzgoja divljači, uređenje lovišta, lovljenje divljači i racionalnu upotrebu divljači i lovišta, koji doprinosi očuvanju biološke raznolikosti ekoloških sistema i ekološke ravnoteže prirodnih staništa divljači.

Član 2.

U ovom zakonu u upotrebi su pojmovi sa sljedećim značenjem:

Divljač, u pogledu ovog zakona su određene vrste životinja (lovna divljač) koje slobodno žive u prirodi.

Pravo lova je ovlaštenje da se na određenoj površini zemljišta i voda provedu radnje i poduzimaju mjere uzgoja, zaštite, lova i upotrebe divljači.

Korisnik zemljišta je vlasnik i korisnik zemljišta na kojem je osnovano lovište.

Lovište je određena površina zemljišta koja predstavlja zaokruženu prirodnu cjelinu u kojoj postoje ekološki i drugi uslovi za uzgoj, zaštitu, lov i upotrebu divljači.

Otvoreno lovište je ono u kojem je moguća neometana dnevna i sezonska migracija divljači.

Ograđeno lovište je ono u kojem je smanjena mogućnost (prirodno ili ograđeno preprekama) migracija divljači. Koristi se za intenzivni uzgoj, a površina ne može biti manja od 600 ha.

Uzgajalište divljači nalazi se na površinama zemljišta većim od 100 ha a manjim od 2000 ha, ograđeno je ogradom, gdje se proizvodi divljač za reprodukciju i lov.

Zvjerinjak je površina zemljišta do 100 ha ograđena ogradom, koju divljač ne može napustiti

Lovno-privredna osnova je planski akt kojom se uređuje gospodarenje divljači i lovištem za desetogodišnji period. Bez lovno-privredne osnove lov divljači nije dopušten.

Program uzgoja divljači je planski i privredni akt kojim se potanko uređuje uzgoj, zaštita, lov i upotreba divljači u uzgajalištima divljači.

Trofej divljači je divljač ili njezini dijelovi uređeni za duže čuvanje i ocjenjivanje.

Vrhunski trofej divljači je trofej ocijenjen većim brojem bodova tačaka od evidentiranog najjačeg trofeja pojedine vrste divljači u Federaciji.

Vrhunski trofeji krupne divljači ne smiju se iznositi iz Federacije.

Lov je skup osmišljenih aktivnosti čovjeka, u svrhu odstrijela ili hvatanja životinja, zakonom označenih kao divljač.

Član 5.

Lovljenje divljači obuhvata traženje, dočekivanje, posmatranje, slijeđenje, odstrjel i hvatanje žive divljači, lovljenje pticama grabljivicama, sakupljanje uginule divljači i njezinih dijelova.

Član 6.

Za vršenje lovstva, osnivaju se lovišta.

U lovište ne ulaze:

- izgrađeno i neizgrađeno građevinsko zemljište;
- javni putevi i druge javne površine uključujući i zaštitni pojas do 300 m od naselja;
- određeni dijelovi prirode koji su proglašeni posebno zaštićenim objektima prirode po propisima o zaštiti prirode u kojima je aktom o proglašenju ili posebnim aktom zabranjen lov (nacionalni parkovi, parkovi prirode, strogi rezervati, specijalni zoološki i ornitološki rezervati i drugi posebno zaštićeni objekti prirode);
- more i privredni ribnjaci s obalnim zemljištem koje služi za korištenje ribnjaka.
- rasadnici, voćni i lozni nasadi namijenjeni intenzivnoj proizvodnji u površini do 100 ha, ako su ograđeni ogradom koja sprječava prirodnu migraciju sve dlakave divljači;
- druge površine na kojima je aktom o proglašenju njihove namjene zabranjen lov;
- ograđeni prostori u kojima se umjetno uzgaja divljač;
- privatni posjedi, ako se na njima pričinjava šteta.

Član 7.

Na površinama zemljišta i na vodama izvan lovišta divljač je dužan zaštititi vlasnik zemljišta, pravno ili fizičko lice i kantonalno ministarstvo na čijem se području nalazi zemljište i vode koje se koriste.

Zabranjen je lov zaštićene divljači na zemljištima i vodama izvan lovišta.

Izuzetno od stava 1. ovog člana, u slučajevima kada se radi o površinama zemljišta većim od 100 ha pravnih ili fizičkih lica koja koriste ta zemljišta, kantonalno ministarstvo povjerit će zaštitu divljači na takvim površinama drugim pravnim ili fizičkim licima.

Član 10.

Korisnici lovišta su pravna lica koji su na osnovu odredbi ovog zakona dobili lovište na gospodarenje.

Korisnici lovišta u pogledu ovog zakona mogu biti: lovačka udruženja, privredna društva šumarstva, te ostala pravna lica registrirana za bavljenje lovstvom.

Korisnici lovišta se mogu dobrovoljno povezivati u lovačke asocijacije, radi unaprjeđenja i ostvarivanja zajedničkog ili opšteg interesa ili cilja, u skladu sa odredbama Zakona o udruženjima i fondacijama ("Službene novine Federacije BiH", broj: 45/02).

Član 12.

Lovački savezi u Federaciji BiH su samostalne organizacije u koje su svojevrijemno učlanjeni korisnici lovišta i druge organizacije i udruženja zainteresirane za razvoj lovstva i na koje se primjenjuju sve odredbe Zakona koje su inače propisane za udruženja.

Lovački savez u pogledu ovoga Zakona obavlja svoju osnovnu djelatnost (za koju je registrovan), te vrši poslove koji su mu, kao javna ovlaštenja povjereni ovim Zakonom, odnosno za koje je ovlašten, a naročito:

- unaprijeđenja lovstva;
- pružanje stručne pomoći kod donošenja i sprovođenja mjera gospodarenja lovištem i obrazovanja lovaca;
- dosljedno sprovođenje zakona i drugih propisa o lovstvu i davanje prijedloga za njihovo unapređenje;
- ostvarivanja jedinstvene lovne politike iz oblasti lovstva, kao i ostvarivanje odnosa sa inostranim lovačkim udruženjima;
- realizacije lovnog menadžmenta.

Korisnik lovišta je dužan:

- izvršiti inventuru životinjskih vrsta i stanja lovišta;
- obezbjeđivati finansijska sredstva za sprovođenje lovno-privredne osnove, za štete na divljači i lovištu, kao i nadoknadu štete koju čini divljač (osiguranjem kod osiguravajućeg zavoda, pologom kod banke, hipotekom na nekretnine i sl.);
- da ima stručnu službu, odnosno stručnjaka za sprovođenje lovno-privredne osnove;
- da ima organizovanu lovočuvarsku službu;
- da ima lovačke pse odgovarajuće pasmine za lovište koje uzima u zakup, koji posjeduje rodni list (rodovnik, pedigree) jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru) i imaju položen ispit u radu;
- da ima lovačkog psa osposobljenog za praćenje krvnog traga ili krvosljednika s položenim ispitom, ako u lovištu koje uzima u zakup ima predviđen odstrjel krupne divljači.

Osim uslova iz stava 2. ovog člana, korisnik lovišta obavezno stavlja na uvid ispravu iz koje je vidljivo da je registrovan za obavljanje lova.

Član 13.

Divljač u pogledu ovog zakona su slijedeće vrste životinja:

a) DLAKAVA DIVLJAČ (SISARI)

- **Glodari** (*Rodentia*): zec (*Lepus europeus*), divlji kunić (*Oryctolagus cuniculus*), bizamski pacov (*Ondatra zibethicus*), puh obični (*Glis glis*), vjeverica (*Sciurus vulgaris*);
- **Mesojedi** (*Carnivora*): divlja mačka (*Felis silvestris*), ris (*Lynx lynx*), vuk (*Canis lupus*), čagalj (*Anis aureus*), lisica (*Vulpes vulpes*), kuna zlatica (*Martes martes*), kuna bjelica (*Martes foina*), smeđi tvor (*Putorius putorius*), velika lasica – hermelin (*Mustela erminea*), lasica mala (*Mustela nivalis*), vidra (*Lutra lutra*), jazavac (*Meles meles*), mrki medvjed (*Ursus arctos*).
- **Papkari** (*Arctiodactyla*): obični jelen (*Cervus elaphus*), jelen lopatar (*Dama dama*), srna (*Capreolus capreolus*), divokoza (*Rupicapra rupicapra*), kozorog (*Capra ibex*), muflon (*Ovis musimon*), divlja svinja (*Sus scrofa*)

Član 15.

Za zaštićenu, određuje se sljedeća divljač:

- dlakava divljač: divokoza, srna, vidra, muflon, kozorog, mrki medvjed, jelen lopatar, zec, vjeverica, puh, ris;
- pernata divljač: prave koke, divlje patke, divlje guske, šljuke, čaplje (osim sive čaplje), rode, labudovi, supovi – lešinari, orlovi, škanjci, eje, lunje, sokolovi, nesiti, sivi ždral, jastrebovi, droplje, liske, žalarke, prutke, muljače, vivak pozvizdač, pomornici, galebovi, čigre, kirgiska sana, golubovi, sove, ronci, vranci, gnjurci, pljenori, gavran, galica, čolica i galica crvenokljuna.

Korisnik lovišta može proglasiti zaštićenom i divljač koja nije navedena u stavu 1. ovog člana.

Član 17.

Lovostajem zaštićena divljač je: mrki medvjed na uzgojnim područjima, srna, divokoza, jelen lopatar, muflon, kozorog, zec, vuk, kuna, divlja svinja, veliki tetrijeb-mužjak, fazan, prepelica, jarebica kamenjarka, jarebica poljska, jarebica šumska-mužjak, šljuke, divlji golubovi, grlica, divlje patke, divlje guske i crna liska.

Uzgojno područje za medvjeda iz stava 1. ovog člana obuhvata prostore na kojima postoje ekološki i prirodni uslovi za njegov opstanak (razvoj i reprodukcija).

Uzgojna područja mogu se osnovati i za druge vrste zaštićene divljači.

Uzgojna područja osniva Federalni ministar na prijedlog kantonalnog ministarstva, odnosno kantonalnih ministara ako se lovište nalazi na području više kantona.

Izvan uzgojnog područja medvjed nije zaštićen.

Lovostaj se ne odnosi na divljač koja se uzgoja u ograđenom prostoru čija je površina manja od 1,0 ha.

Član 25.

Ograđivanje lovišta, čija površina ne može biti manja od 600 ha, u cilju intenzivnog gospodarenja, ako nije predviđeno lovnom osnovom, može se vršiti samo uz odobrenje Federalnog ministarstva.

Član 26.

Naseljavanje novih vrsta divljači vrši se na osnovu odobrenja Federalnog ministarstva.

Odobrenje se donosi na prijedlog kantonalnog ministarstva.

Naseljavanje iz stava 1. ovoga člana vrši se uz prisustvo nadležnog inspektora, predstavnika ministarstva i korisnika, kao i drugih lica na licu mjesta, uz obavezu da se sačini zapisnik i konstatuju urađene radnje.

Uz zahtjev za odobrenje korisnik lovišta dostavlja stručno mišljenje i uvjerenje o zdravstvenom stanju divljači koja se naseljava.

Član 27.

Izuzetno, na osnovu odredaba člana 20. stava 2. ovog zakona za potrebe naučnog istraživanja, obrazovanja, zooloških vrtova, muzeja, naseljavanje lovišta i suzbijanja zaraznih bolesti, federalni ministar može odobriti hvatanje i držanje divljači u zatvorenom, odnosno, ograđenom prostoru.

Za potrebe treninga i ispitivanje urođenih osobina lovačkih pasa, kantonalni ministar može odobriti držanje nezaštićene divljači u ograđenom prostoru, na zahtjev korisnika lovišta i po pribavljenom mišljenju nadležnog Lovačkog saveza.

U slučajevima iz st. 1. i 2. ovog člana u odobrenju će se propisati način i mjere koje će se pri tome sprovoditi, te rok važnosti odobrenja.

Član 31.

Lovištem, u pogledu ovog zakona, smatraju se površine zemljišta, šuma i voda koje predstavljaju prostornu, prirodnu i lovno-privrednu cjelinu u kojoj postoje uslovi za trajan opstanak, uzgoj, razmnožavanje, zaštitu i upotrebu divljači, bez obzira na vlasništvo.

Lovište osniva kantonalna skupština na prijedlog kantonalnog ministarstva.

Akt o osnivanju lovišta sadrži: naziv lovišta, granice i ukupnu površinu lovišta, vrste divljači koje ga naseljavaju, divljač koja je pod posebnom zaštitom i druge potrebne podatke.

Lovišta koja se prostiru na površinama šuma sa posebnom namjenom (znanstvenog, kulturnog, vjerskog, povijesnog i dr. značenja) kao i na površinama koje predstavljaju izuzetno prigodna staništa rijetkih, vrlo rijetkih i vrijednih vrsta divljači, Vlada Federacije Bosne i Hercegovine (u daljem tekstu: Vlada Federacije) na prijedlog federalnog ministra može proglasiti posebnim lovištem.

Ako se lovište nalazi na području dva ili više kantona, mišljenje za formiranje posebnog lovišta daju sporazumno kantonalni ministri.

Aktom o osnivanju lovišta iz prethodnog stava Vlada Federacije određuje i korisnika lovišta.

Član 34.

Lovišta se mogu osnivati kao: otvorena lovišta, ograđena lovišta i uzgajališta divljači.

Otvoreno lovište je lovište u kojem je omogućena dnevna i sezonska migracija dlakave i pernate divljači. Ovo lovište ne može biti manje od 1.000 ha za nisku i 3.000 ha za visoku divljač.

Ograđeno lovište je lovište koje je ograđeno prirodnim (široki vodotoci, velike vodene površine i sl.) ili umjetnim (ograde ili slični uređaji ili građevine i sl.) preprekama koje sprječavaju ili znatno umanjuju mogućnost da divljač, koja se u njemu prvenstveno uzgaja, štiti i lovi, napusti tu površinu.

Ograđeno lovište obuhvata površinu na kojima postoje uslovi za intenzivni uzgoj, zaštitu, lov i upotrebu divljači, a ne može biti manje od 600 ha.

Uzgajalište divljači obuhvata površine zemljišta veće od 100 ha, a manje od 2000 ha na kojima se mogu uzgajati pojedine vrste divljači za proizvodnju većeg broja kvalitetne i zdrave divljači namijenjene lovu i reprodukciji.

Iznimno od stavka 5. ovog članka, uzgajalište divljači može se osnivati na vlastitim površinama gospodarskog ribnjaka sa obalnim zemljištem ili rasadnicima i voćnim i loznim nasadima namijenjenim za intenzivnu proizvodnju.

Član 36.

Lovište se daje na gospodarenje korisniku lovišta, u skladu sa ovim zakonom i Zakonom o koncesijama ("Službene novine Federacije BiH", broj 40/02).

Jednom korisniku lovišta na gospodarenje se može dati više lovišta.

Korisnik lovišta, lovište ili njegove dijelove ne može davati pod zakup ili ustupiti drugom korisniku.

Član 37.

Vlada kantona, na prijedlog kantonalne Komisije za koncesije dodjeljuje koncesiju najpovoljnijem ponuđaču koji je ispunio i zadovoljio sve kriterije utvrđene u tenderu (poziv na javni tender) i visokog je ranga u odnosu na ostale ponuđače.

Lovište se daje na gospodarenje na određeno vrijeme.

Rok na koji se daje lovište ne može biti kraći od 10 godina, a ni duži od 30 godina.

Član 39.

O predaji lovišta na gospodarenje zaključuje se ugovor između kantonalnog ministarstva i korisnika lovišta.

Ako se lovište daje pod koncesiju, Ugovor o koncesiji mora obavezno sadržavati sve elemente iz člana 29. Zakona o koncesijama, ali također mora sadržavati: naziv lovišta, podatke o sudskoj registraciji korisnika lovišta, vrijeme na koje se daje lovište na gospodarenje, granice lovišta, procjenu brojnog stanja divljači, uslove kojih se korisnik lovišta mora pridržavati, mjere koje je korisnik lovišta dužan poduzeti u cilju unapređivanja lovišta, mjere zaštite divljači, uslove organiziranja i finansiranja lovočuvarske službe, odredbe o sprovođenju lovno-privredne osnove, visinu i načinu plaćanja nadoknade, kao i uslove za raskidanja ugovora.

Pored elemenata iz stava 2. ovoga člana ugovorne strane mogu ugovoriti i druge obligaciono pravne elemente.

Član 44.

Za svako lovište osniva se i vodi katastar lovišta.

Katastar lovišta osniva i vodi korisnik lovišta, a jedan primjerak katastra obavezno se dostavlja kantonalnom ministarstvu.

Korisnik iz stava 2. ovog člana dostavlja propisane podatke o katastru kantonalnom ministarstvu najdalje do 30. aprila tekuće godine za proteklu lovnu godinu.

Sadržaj i način vođenja katastra lovišta propisuje Federalni ministar.

Član 45.

Za svako lovište donosi se lovno-privredna osnova.

Lovno-privredna osnova je dugoročni planski dokument kojim se uređuje gospodarenje lovištem i divljači za desetogodišnji period.

Lovno-privrednu osnovu donosi korisnik lovišta za period od najmanje 10 godina.

Lovno-privrednu osnovu korisnik lovišta dužan je donijeti u roku od jedne godine od dana preuzimanja lovišta, a može je izraditi pravno lice registrovano za djelatnost lovstva ili fizičko lice (šumarski inženjer, inženjer lovstva i zaštite prirode) sa obrtnicom za obavljanje te djelatnosti.

Odredbe lovno-privredne osnove su obavezne i bez nje lov nije dozvoljen.

U finansiranju izrade lovno-privredne osnove sudjeluje 50% korisnik lovišta i 50% kantonalno ministarstvo, a ako se lovište daje pod koncesiju, koncesionar finansira ukupan iznos izrade lovno-privredne osnove.

Član 46.

Federalno ministarstvo daje saglasnost na lovno-privrednu osnovu.

Izrada nove lovno-privredne osnove mora biti završena četiri mjeseca prije isteka važeće lovno-privredne osnove.

Federalno ministarstvo, na osnovu prijedloga stručne komisije, donosi rješenje o odobrenju lovno-privredne osnove ili stavlja primjedbe na ponuđenu osnovu.

Greške i nedostatke lovno-privredne osnove utvrđene od stručne komisije dužno je otkloniti lice kojem je povjerena izrada osnove.

Za lovišta koje je osnovala Vlada Federacije lovno-privrednu osnovu odobrava Federalno ministarstvo.

Ako se lovište nalazi na području dva i više kantona, mišljenje na lovno-privrednu osnovu sporazumno daju kantonalna ministarstva putem zajedničkog akta, a Federalno ministarstvo daje suglasnost na osnovu.

Finansiranje lovno-privrednih osnova za posebna lovišta snosi Vlada Federacije.

Sastav, rad i troškove stručne komisije iz stava 2. ovoga člana propisat će federalni ministar.

Član 48.

Do donošenja lovno-privredne osnove korisnici lovišta gospodare lovištem na osnovu privremenog godišnjeg plana gospodarenja lovištem, a najduže jednu godinu.

Redovni godišnji plan gospodarenja sadrži naročito mjere za unapređenje lovstva kao i obim korištenja pojedinih vrsta divljači i utvrđuju prostori u lovištu na kojima se mogu obučavati lovački psi.

Godišnji plan donosi se do 31.marta za period od 1. aprila tekuće do 31.marta naredne godine (lovna godina).

Lov se može vršiti tek poslije donošenja godišnjeg plana.

Godišnji plan dostavlja se kantonalnom ministarstvu najkasnije do 30. aprila, a izvještaj o izvršenju plana za proteklu godinu do 31.maja.

Saglasnost na godišnji plan gospodarenja lovištem daje kantonalno ministarstvo, a na godišnje planove gospodarenja za posebna lovišta daje Federalno ministarstvo. Lov se može vršiti nakon dobivene saglasnosti.

Član 49.

Bliži propis o sadržaju, načinu izrade i nosiocima izrade lovno-privredne osnove lovišta, privremenog godišnjeg plana gospodarenja lovištem i godišnjeg plana gospodarenja lovištem donosi Federalno ministarstvo.

Izrada lovno-privredne osnove i njihova revizija može se povjeriti pravnom licu koje je registrovano za tu djelatnost i ima zaposleno stručno lice sa završenim šumarskim fakultetom ili inženjer lovstva i zaštite prirode.

Revizija lovno-privredne osnove vrši se kada se trajno ili bitno izmjene uslovi i okolnosti na kojima se zasniva lovno-privredna osnova, a posebno uslijed uginuća više od 1/3 divljači, požara, elementarnih nepogoda, trovanja i slično.

Revizija lovno-privredne osnove vrši se po postupku propisanom za njeno donošenje.

Član 50.

Korisnici lovišta dužni su voditi evidenciju o izvršenim radovima i sprovedenim mjerama predviđenim lovno-privrednom osnovom i godišnjim planom.

Korisnik posebnih lovišta dužan je Federalnom ministarstvu dostaviti izvještaj o izvršenju godišnjeg plana gospodarenja za proteklu godinu.

Izvještaji iz st. 1. i 2. ovog člana dostavljaju se do 31. 03. tekuće godine.

Evidencija izvršenih radova iz st. 1. i 2. ovog člana upisuje se u obrasce koje donosi federalni ministar.

Član 51.

Sredstva koja korisnik lovišta ostvari u gospodarenju lovištem smiju se koristiti samo za gospodarenje i unapređivanje lovstva ukoliko ovim zakonom nije drugačije određeno.

Unapređivanjem lovstva smatra se :

- zaštita, održavanje i poboljšanje životnih uslova za divljač u lovištu (poboljšavanjem ispasišta, dodatnim hranjenjem, održavanjem solila i pojilišta);
- dostizanje i održavanje odgovarajuće spolne i starosne strukture pojedinih vrsta divljači u okviru utvrđenog kapaciteta lovišta;
- unošenje novih vrsta divljači u lovište;
- čuvanje i zaštita divljači i lovišta;
- izgradnja lovno-uzgojnih i lovno-tehničkih objekata;
- preduzimanje mjera za smanjenje šteta koje počinu divljač;
- stručno osposobljavanje kadrova;
- izrada planskih dokumenata;
- naučno-istraživački rad u lovstvu;
- nabavka rasnih lovačkih pasa i
- izdavačka djelatnost.

Član 56.

Članovi lovačkih udruženja lov divljači visokog lova vrše na osnovu odobrenja za odstrjel, a lov divljači niskog lova na osnovu lovne karte.

Strani i domaći lovci turisti love na osnovu odobrenja za odstrjel (dozvole za lov).

Odobrenje za odstrjel i lovnu kartu izdaje korisnik lovišta, a jedinstvene obrasce donosi federalni ministar.

Član 57.

Divljač je zabranjeno uznemirivati i loviti:

- 1) u vrijeme kada je na prostoru na kome je divljač ugrožena poplavom, snijegom, požarom, poledicom i prirodnim nesrećama;
- 2) otrovom, zamkama, gvožnama, klopnama i omamljujućim sredstvima, a ptice pomoću lijepaka i mreža ili drugih sredstava za masovno uništavanje;
- 3) gađanjem iz motornih vozila, gaženjem motornim vozilima i gađanjem iz motornih čamaca;
- 4) upotrebom reflektora (farova), gramofona, magnetofona, audio aparata i sličnim napravama, živih i umjetnih mamaca- vabila ili pomoću naprava koje djeluju na principu infra-crvenih zraka;
- 5) vojničkim oružjem, vojničkom municijom, sportskim malokalibarskim i poluautomatskim lovačkim oružjem sa više od pet metaka;
- 6) hrtovima i nerasnim psima,
- 7) papkastu lovostajem zaštićenu divljač pomoću pasa;
- 8) medvjeda pogonom i prigonom;
- 9) pticama grabljivicama i zvijerima;
- 10) upotrebom luka i strijele osim lova na visoku divljač u ograđenim lovištima do 1000 ha;
- 11) u noćima bez mjesečine (u noćnom lovu), i bez izgrađenih objekata za lov;
- 12) divljač sačmom na udaljenosti 200 m od naselja i puškom kuglaricom na udaljenosti od 500 m od naselja.

Izuzetno od stava 1. ovog člana, korisnik lovišta može odobriti noćni lov i sa improvizovanih objekata, ako je u pitanju sprječavanje šteta na poljoprivrednim imanjima, te može dopustiti hvatanje mladih divljih svinja u cilju suzbijanja svinjske kuge, na način i pod uslovima propisanim u članu 59. ovog zakona.

Nerasnim psima iz tačke 6. ovog člana smatraju se psi koji nisu registrovani kod nadležne kinološke organizacije i koji nemaju odgovarajući rodovnik.

Zabranjeno je sa psima proganjati divljač izvan terena ograđenog za trening u vremenu od 05. januara do 31. jula.

Zabranjen je lov divljači u plantažnim voćnjacima i vinogradima, rasadnicima i drugim šumskim i poljoprivrednim površinama koje su ograđene ogradom kroz koju dlakava divljač ne može prolaziti, na površinama koje se koriste za vojne poligone i komunalne potrebe, kao i drugim površinama i objektima kada je to utvrđeno posebnim propisima.

Izuzetno, od odredaba stava 1. ovog člana, licu koje ima položen sokolarski ispit dopušten je lov divljači pticama grabljivicama koje su za to posebno školovane.

Sokolarski ispit polaže se pred Komisijom za polaganje lovačkog ispita koja se formira pri Federalnom ministarstvu.

Program sokolarskog ispita i način lova divljači s pticama grabljivicama (sokolarenje) propisuje federalni ministar.

Član 58.

U lovu se smiju isključivo koristiti čistokrvni lovački psi sa položenim ispitom urođenih osobina, potrebnim ispitom u radu propisanim za svaku pasminu pojedinačno, koji posjeduje rodni list jedne od članica Međunarodne kinološke federacije (FCI) i koji imaju pozitivnu ocjenu u obliku (eksterijeru).

Kinološki savezi u Federaciji izdaju rodovnik kojim se dokazuje čistokrvnost i pasminska pripadnost, propisuje uslove za ispit urođenih osobina i svaki pojedini radni ispit te izdaje certifikat za položene radne ispite.

Vrstu i broj pasa za lov na pojedine vrste divljači u određenim područjima propisuje federalni ministar.

Član 61.

Tereni za obuku i trening lovačkih pasa određuju se lovno-privrednom osnovom. U tom cilju može se izdvojiti najviše do 5% ukupne površine lovišta.

Član 67.

Vrhunskim trofejima smatraju se tri po broju CIC poena najjača trofeja određene vrste divljači u Federaciji na osnovu banke podataka o vrijednim trofejima.

Banku podataka o vrijednim trofejima vodi Lovачki savez.

Korisnici lovišta dužni su nadležnom Lovачkom savezu dostaviti podatke iz trofejnog lista za trofeje vrijednosti bronzane medalje pa naviše.

Vrhunski trofej je vlasništvo onog ko je divljač odstrijelio, ali se ne može iznijeti izvan teritorije Federacije sve dok po vrijednosti (CIC poena) ne dođe na 4. mjesto.

Korisnik lovišta je dužan upoznati stranog državljanina prije odlaska u lov o propisima koji vrijede za vrhunske trofeje.

Obavijest o izlaženju određenog trofeja iz kategorije vrhunskih daje nadležni Lovачki savez.

Izuzetno od stava 4. ovog člana, ministar, na prijedlog Lovачkog saveza ili lovačkog udruženja može odobriti iznošenje vrhunskog trofeja izvan teritorije Federacije.

Bliži propis o bankama podataka vrijednih trofeja, kategoriji vrhunskih trofeja i trajanju tog akta odredit će federalni ministar posebnim aktom.

Član 80.

Inspeksijski nadzor nad sprovođenjem ovog zakona vrši, odnosno obavljaju federalni lovni inspektori, federalni granični lovni inspektori i kantonalni lovni inspektori u skladu sa odredbama ovog zakona i Zakona o šumama ("Službene novine Federacije BiH", broj 20/02).

Federalni lovni inspektor ima sljedeće nadležnosti:

1. pregleda lovno-privrednu osnovu i provjerava kako se ona primjenjuje;

2. kontroliše primjenu godišnjeg plana gospodarenja lovištem, poslovne knjige i ostalu dokumentaciju kada je to potrebno radi kontrole primjene propisa i mjera koje se odnose na divljač i lovišta;
3. kontroliše rad Lovačkih saveza u poslovima koji su im povjereni kao javna ovlaštenja ovim zakonom;
4. kontroliše sprovođenje odredbi ovog zakona o sanacijskom odstrjelu, odstrjelu za naučnoistraživačke svrhe kao i sokolarenje;
5. obavlja sve poslove i zadatke iz nadležnosti kantonalnog inspektora za lovstvo ukoliko ovaj iz bilo kojeg razloga ne izvršava poslove i zadatke utvrđene ovim zakonom i propisima donesenih na osnovu njega.

Ukoliko nađe da je povrijeđen ovaj zakon ili drugi propis donesen na osnovu njega Federalni inspektor ima pravo i obavezu:

- rješenjem narediti otklanjanje utvrđenih nedostataka, odnosno nepravilnosti u određenom roku;
- podnijeti nadležnom organu zahtjev za pokretanje prekršajnog postupka;
- poduzeti i druge mjere, odnosno izvršiti druge radnje za koje je posebnim propisima ovlašten.

Kantonalni lovni inspektor ima sljedeće ovlasti:

1. kontroliše da li korisnik lovišta ispunjava propisane uslove za gospodarenje;
2. kontroliše da li je godišnji plan gospodarenja lovištem u skladu sa lovno-privrednom osnovom;
3. kontroliše lovljenje divljači, odobrenje za odstrjel divljači, lovne karte i trofejne listove za ulovljenu divljač;
4. pregleda radove i objekte u lovištima;
5. oduzima do odluke nadležnog organa bespravno ulovljenu ili bespravno prisvojenu uginulu divljač ili njene dijelove, kao i predmete kojima su izvršene ove bespravne radnje;
6. naredi privremene mjere za sprječavanje štete u hitnim slučajevima u kojima bi mogla nastupiti šteta;
7. prikuplja, kad je to potrebno, obaviještenja od svjedoka, vještaka, odgovornih i drugih lica;
8. vodi službene podatke za područje kantona o povredama odredaba ovog zakona i propisa donesenih na osnovu njega;
9. izvještava nadležne organe Federalne uprave o nepravilnostima i predlaže sprovođenje određenih mjera, ako sam nije ovlašten za preduzimanje odgovarajućih mjera;
10. podnosi prijavu za pokretanje prekršajnog postupka radi povrede odredaba ovog zakona i propisa donesenih na osnovu njega;
11. preduzima i druge mjere i radnje za koje je ovlašten posebnim propisima.

Član 81.

Kada nadležni inspektor prilikom vršenja inspekcijskog nadzora utvrdi da propis nije primijenjen ili je nepravilno primijenjen donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.

Protiv rješenja kantonalnog lovnog inspektora može se izjaviti žalba Federalnom ministarstvu u roku od osam dana od dana prijema rješenja.

Protiv rješenja kantonalnog ministarstva može se izjaviti žalba Federalnom ministarstvu u roku od 15 dana od dana prijema rješenja.

Protiv rješenja federalnog lovnog inspektora može se izjaviti žalba Federalnom ministarstvu u roku od osam dana od dana prijema rješenja.

Član 82.

Novčanom kaznom u iznosu od 5.000,00 KM do 20.000,00 KM kaznit će se za prekršaj pravno lice ako:

1. za vrijeme zabrane lova ili lovostaja lovi, proganja ili namjerno uznemiruje divljač (član 14. stav 2. i 3.);
2. dozvoli lov vrsta za koje je propisana stalna zabrana lova (član 16.), privremena zabrana lova (član 18.) ili lovostajem zaštićenih vrsta za vrijeme trajanja lovostaja (član 17.);
3. ako vrši smanjenje broja zaštićene divljači bez dozvole federalnog ministarstva (član 19. stav 2.);
4. postupi protivno odredbama član 21;
5. vrši trovanje divljači suprotno članu 29. stav 1.;
6. lovi zaštićenu divljač na zemljištima i vodama izvan lovišta (član 7. stav 1. i 2.);
7. vrši trovanje divljači bez odobrenja Federalnog ministarstva (člana 29.);
8. unosi u lovište oružje koje nije lovačko i postupa sa njime suprotno članu 30. ;
9. ako korisnik lovišta da u podzakup ili ustupi drugom korisniku lovište (član 38. stav 4.);
10. ako korisnik lovišta ne obezbijedi vršenje stručnih poslova licima predviđenim u članu 42.;
11. ako korisnik lovišta ne vodi katastar lovišta na način kako je propisano članom 44.;
12. na vrijeme ne donese lovno-privrednu osnovu (član 45. i 46.);
13. ne donese i ne dostavi na odobrenje u propisanom roku privremeni plan gospodarenja i godišnji plan gospodarenja lovištem (član 48.);
14. ne donese opšti akt iz člana 53.;
15. postupi protivno odredbama člana 56. st. 1. i 2. i člana 57. stav 1. tačka 1-12 i stav 4. i 5.;
16. ne obezbijedi i ne organizira lovočuvarsku službu na način kako je propisano članom 75.;
17. lovnom inspektoru ne omogući pregled po osnovu ovlaštenja iz člana 80.

Za prekršaj iz stava 1. ovog člana kaznit će se novčanom kaznom od 1000,00 do 2000,00 KM i odgovorno lice u pravnom licu:

Član 83.

Novčanom kaznom u iznosu od 2.000,00 do 10.000,00 KM kaznit će se za prekršaj pravno lice ako:

1. vlasnik pušta pse bez kontrole po lovištu, odnosno korisnik lovišta ne uklanja pse i mačke koji se kreću bez kontrole po lovištu (član 22.);
2. vrši ograđivanje lovišta protivno odredbama člana 25.;

3. ako vrši naseljavanje novih vrsta divljači bez odobrenja federalnog ministarstva (član 26.);
4. postupi protivno odredbama člana 27 ;
5. ako korisnik lovišta vidljivo ne obilježi granice lovišta (član 35. i 41.);
6. ne uosnovi katastar lovišta ili ne dostavi kantonalnom ministarstvu katastar lovišta (član 44.);
7. ako korisnik lovišta lov vrši prije dobivene saglasnosti (član 48.stav 7.);
8. ako ne izvrši reviziju lovno-privredne osnove (član 49.stav 3);
9. na propisanim obrascima i rokovima ne vodi evidenciju o izvršenim radovima i mjerama predviđenih osnovom i godišnjim planom (član 50.);
10. koristi ostvarena sredstva za druge svrhe, a ne za gospodarenje i unapređenje lovišta (član 51.);
11. ako korisnik lovišta ne spriječi sva neetička ponašanja u lovištu (član 52.);
12. ne obezbijedi odobrenje za odstrjel odnosno lovnu kartu (član 56.);
13. dozvoli lov članovima lovačkog udruženja koji nemaju položen lovački ispit (član 55.) i koji nisu članovi lovačkih udruženja;
14. ako korisnik lovišta ne vodi evidenciju o izdatim trofejnim listovima (član 64.stav 3.);
15. ako nadležni lovački savez ne vodi banku podataka o vrijednim trofejima (član 67.stav 2.);
16. dozvoli iznošenje trofeja izvan teritorije Federacije (član 67.stav 4. i 7.);
17. ne izda legitimaciju lovočuvara i lovočuvar ne vodi službenu knjigu (član 77. stav 1. i 2.)

Za prekršaj iz stava 1. ovog člana kaznit će se novčanom kaznom od 1.000,00 do 2.000,00 KM i odgovorno lice u pravnom licu.

Član 84.

Novčanom kaznom od 1.000,00 do 2.000,00 KM kaznit će se prekršaj pojedinca (fizičko lice) ako:

1. za vrijeme zabrane lova ili lovostaja proganja, lovi ili uznemiruje divljač ili na neki drugi način ugrožava opstanak divljači (član 14. stav2.);
2. ako vrši lov ptica i sisavaca korisnih za poljoprivredu i šumarstvo (član 21.stav 1.i 2.);
3. bez odobrenja ministra drži divljač u ograđenom prostoru (član 27. stav 2.);
4. vrši trovanje divljači suprotno odredbama člana 29. stav 1.);
5. ako odstrjel divljači vrši ne lovačkim oružjem (član 54. stav 1.);
6. ako se lov vrši nabojima koji nisu lovački ili poluautomatskom ili automatskom puškom (član54. stav 3.);
7. ako vrši lov krupne divljači osim svinja, prigonom, progonom sa psima (član 54. stav 4.);
8. vrši promet divljači i njenih dijelova protivno odredbama člana 63.stav 1.,
9. vrši lov bez lovne karte, odnosno odobrenja za odstrjel (član 56. stav 1.),
10. lovi divljač u slučajevima navedenim u članu 57. stav 1. tačka 1-12, te stav 4. i 5.,
11. ako se u lovu koristi ne čistokrvnim lovačkim psima sa ispitima (član 58. stav 1.);
12. ako vrši lov divljači mrežama, klopka i omamljujućim sredstvima bez odobrenja federalnog ministra (član 59.stav 1.);
13. ako uginulu divljač ili ulovljenu divljač koristi suprotno članu 62.stav 1.

14. iznosi sa područja lovišta ulovljenu divljač i njene dijelove bez popratnice, odnosno trofejnog lista (član 64.stav 2.);

15. na zahtjev lovočuvara ne pokaže lovačke i druge isprave ili ne dozvoli pregled ulova, sredstava za lov ili sredstava za prijevoz odnosno prijenos stvari (član 76. stav 1. tačke 1-5.).

Član 88.

Korisnici koji gospodare lovištima dužni su u roku od godinu dana od dana stupanja na snagu ovog zakona uskladiti svoje poslovanje, opće i druge akte sa odredbama ovog zakona.